



Jens NapätôK'
Inatsisartunut ilaasortaq, Naleraq

Ilulissani Naalakkatta Illua pillugu § 37 nr.162/2026 naapertorlugu apeqqutitut akissuteqaat

24-08-2026
Suliap nr. 2026-3567
Akt nr. 26745755

Postboks 1029
3900 Nuuk
Tlf: +299 34 50 00
Email: ikin@nanoq.gl
www.nanoq.gl

Asasara Jens NapätôK

Inatsisartut suleriaasiat naapertorlugu apeqqutitut saqqummiussanut qujanaq. Apeqqutit tullinnguuttuni akissuteqarfigissavakka.

Aningaasaqarnermut Naalakkersuisoqarfik iluarsartuussinernik sulianik isumaginnittuummat akissuteqaasiornermi ilanngussaqaqqullugu qinnuigineqarpoq.

Apeqqut 1: Naalakkersuisup § 37 naapertorlugu apeqqummut nr. 035/2026-imut akissummini Naalakkatta Illuata Ilulissaniittup iluarsartuunneqarnera 2026-mi juuni–juulimi naammassineqassasoq naatsorsuutigineqartoq ilisimatitsissutigaa. Iluarsartuussinernup piffissami tassani naammassineqarsimannginneranut suna pissutaava?

Akissut: Suliamut pilersaarummi piffissaliunneqartoq naapertorlugu ingerlatsisoqassasoq siornatigullu taanna naatsorsuutigineqarluni tunngavigineqarnikuusoq Aningaasaqarnermut Naalakkersuisoqarfik paasissutissiivoq. Iluarsartuussinernup pilersaarusiornerni piviusunngortinneranilu pissutsinik assigiinngitsunik pilersaarut kalluarneqarpoq. Neqerooruteqarnermi atortussat suliarinerisa nalaani illutap ilaani sananermi atorneqarnikuusut asbesteqarnerisut erseqqissumik paasineqarnissaat pisariaqalerpoq. 25. juuni 2026 sananermi atorneqarnikuusut ilaannit misissoqqissaagassamik peersisoqarpoq. Misissoqqissaakkap inernerani 7. aggusti 2026-mi tiguneqartumi atorneqarnikuusut asbestitaqanngitsut ersersinneqarpoq. Neqerooruteqarnissamut atortussiornernup suliarineqarnerata nalaani misissueqqissaarnerit pisariaqartut kingunerisaannik siornatigut pilersaarusiaq malinneqarsinnaajunnaarpoq.

Apeqqut 2: Piffissaliussap Naalakkersuisut siusinnerusukkut Inatsisartunut ilisimatitsissutigisaata malinneqarsinnaasimannginneranut pissutsit suut peqqutaappat?

Akissut: Neqerooruteqartitsinermi atortussat naammassineqarnissaat sananermilu atorneqarnikuusut asbestitaqarnerisut erseqqissumik paasineqarnissaat peqqutaallutik

piffissaliussaq pisariaqartumik kalluarneqarsimasoq Aningaasaqarnermut Naalakkersuisoqarfik nalunaarpoq. Tassunga tullinnguullugu ingutserineq oqunnernillu piiaaneq ingerlanneqarpoq. Maannakkut iluarsartuussineq illutap sanaqqinnerata nalaaniippoq.

Apeqquut 3: Iluarsartuussinerup 2026-mi juulip naanerani naammassineqarsinnaannginnissaa Naalakkersuisup qaqugukut ilisimasaqarfigilerpaa?

Akissut: Suliamut killiffiliussaq kingulleq aallaavigalugu pilersaarusiap allanngortinneqarnera Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfiup ilisimalerpaa. Taassumalu kingunerisaanik piffissaliussaq ilisimatitsissutigineqartoq tunngavigalugu akissuteqaat Naalakkersuisoqarfiup suliaraa.

Apeqquut 4: Naalakatta Illua atoqqinneqarsinnaalersinnagu suliassat suut suli naammassineqarnissaat amigaataappat?

Akissut: Ingutserinerit oqunnernillu piiaanerit naammassineqartut Aningaasaqarnermut Naalakkersuisoqarfik nalunaarpoq. Sanaartukkap sanaqqinnissaanut suliassaq pisariaqartinneqartoq maannakkut amigaataavoq. Sanaqqinnissami atortussat pisariaqartut Ilulissanut nassiunneqarnissaat apeqqutaaginnalerpoq.

Apeqquut 5: Naalakkersuisut maanna iluarsartuussinerup qaqugu naammassineqarnissaa aammalu oqaluffiup qaqugu ammaqqinneqarnissaa naatsorsuutigaat?

Akissut: Naammassineqarnissaanut maannakkut ulluliisoqarsinnaanngikkallartoq Aningaasaqarnermut Naalakkersuisoqarfik ilisimatitsivoq. Maannakkut iluarsartuussineq sanaartukkap sanaqqinnerata nalaaniippoq, sinneranullu piffissaliunneqartussamut atortussat pisariaqartut Ilulissanut nassiunneqarnissaat apeqqutaaginnalerluni. Nassiussinissamut piffissaq sanaartorerullu sinneranut suliaqarnissaq qularnaarneqarpat naammassinissamut, ammaanissamut sanaartoqqinnermullu erseqqinnerusumik naatsorsuutigineqartut Naalakkersuisut oqaatigisinnaalissavaat.

Apeqquut 6: Piffissaliussap nutaap malinneqarsinnaanissaa Naalakkersuisut qanoq nali-lerpaat, aammalu pissutsit suut suli kinguaattoornernik pilersitsisinnaappat?

Akissut: Suliassamut sinneruttumut piffissaliunneqartussaq tamaat qulakkeeqqaartinnagu Naalakkersuisut neriorsuuteqarsinnaanngillat. Sanaartoqqinnermi atortussat nassiunneqarnissaat nalunartut annersaraat. Naammassineqarnissaanut piffissaliunneqartussamut nassiussinissamut kinguartoornernit suli kalluaasinnaammata.

Apeqquut 7: Naalakkersuisut 2026-mi juulip naannginnerani piffissaliussap siusinnerusukut ilisimatitsissutigineqartup malinneqarsinnaannginnissaa ilisimareersimagunikku, sooq Ilulissani innuttaasut Inatsisartullu kinguaattoorneq aammalu piffissaliussaq

nutaaq pillugit ilisimatinneqanngillat?

Akissut: Pilersaarut naapertorlugu suliaq ingerlanissaa naatsorsuutigalugu juuni-juuli 2026-mi piffissaliunneqarnikuuvoq. Sanaartornermi atorneqarnikuusut asbestitaqarnersut paasiniarnissaat misissoqqissaarnissaallu pisariaqartoq suliaq ingerlanerani paasineqarpoq. 7. agusti 2026 misissueqqissaarnermi inernerit saqqummiunneqarput. Atortussat pisariaqartut nassiunneqarnerisa tunniussivissap sivilissusaa pissutaalluni suli nalornisitsivoq, tassungalu tunngatillugu suliaq maannakkumut iluarsartuussineq illutap sanaqqinnerata nalaaniippoq. Taamaattumik naammassineqarnissaanut nutaamik piffissaliunneqartussaq erseqqissoq nalunaarutigineqarsinnaanikuunngilaq.

Inussiarnersumik inuulluaqqusillunga


Nivi Olsen